

Churer Schnudergoofa

Ausschnitte aus dem Programm 2010

Dr Schtadtrot häts jetz teilwiis checkt und endlich z'Gsetz aapasst,
bald töfsch z'Chur noch am zwölfi wieder ässa uf dr Gass.

Dass zum Kebab au suufa sötsch, davo wänds gliich nüd wüssa,
do khasch nu säga: „Däna häts halt doch ins Hirni gschissa!“

Dia Typa suufend selber nüt und bliibend schtur drbii,
a Döner ohni Flüssigkeit, dä fahri viil meh ii.

I schtell miar vor, was do passiert, noch so viil trochna Schpiisa,
do muasch am andra Tag doch prompt mim Schtaubsuuger go schiissa!

Da Züzis iari FDP löst z'Usländer-Problem,
Sie sait, wer nit recht schnorra khönn, seg bi üüs nit genehm.
Wär noch eim Joohr do in dr Schwiz, nit tuusig Wort kapiert,
dä segi doch nit integriert und werdi exportiert.

Doch tuusig tütschi Wörter noch'ma Joohr sind huara viil,
do bruuchti mängga Schwizer für die Prüafig no a biz Drill.
Und wenn dia Massnahm wüekli khunnt, Befehl vum Bundeshuus,
dänn bürgrend miar als erschta dr Hakan Yakin uus!

A ganz verreckta Shtau häts geh, will Müller, Meier, Bilic
mim Kharra an d'Eröffnig sind vom neua Outlet-Village.
A jeda isch döt hära blocht, au nu zum Hot-Dog frässa,
hüt schtönd dia halba Hüüsli leer, das Gschäft khasch glatt vergässa!

Jetz suacht ma Mieter wia verruckt, ma redt mim Socka-Hitsch,
damits au öppis Bruuchbars git, näb all dem Bogner-Kitsch.
Doch d'Rettig gseht viel geiler uus, dr Erotikmarkt will khoo,
er füart für dia Erwachsna bald z'Landquart a Schtreichelzoo.

In China händs a Gen-Riis gmacht, bald werdend Menscha kloont,
a Gfohr drbii gäbs kheini, wird ganz offiziell betoont.
Au miar sind total überzügt, es khann gar nüt passiera,
solang d'Novartis nit probiert, dr Chris von Rohr z'kopiera.

Au miar händ öppis uusprobiart, und heimlich ganz verschmitzt,
am Schkiilift vuma Zürcher a paar Schtammzella schtibitz.
Dia hämmer in a Gläsli tua und khönnd eu jetza prichta,
dass üs als erschta glunga isch, a Riisa-Schnorra z'züchta.

Jetz khömmend mr zum Ulrich Schlüer, am Retter mit am Schwert,
dä schtoppt d'Islamisiarig und tritt ii für üüsri Wert.
Er sait: „Dank miar blibts in dr Schwiz bi nu viar Minarett“,
und frisst wia alli SVPLer jetz no meh Raclette.

Doch kürzlich uf am Pissoir im Bundeshuus, so a Seich,
do wirts am Schlüer ganz plötzli schlecht, er isch uu huara bleich.
Näb ihm dr Toni Brunner grinst: „Friss halt no meh Raclette!“

Dr Schlüer luagt abwärts und sait: „ Mischt! I glauba mina redt!“

Im Bund sind jetz drei Wiiber Chef, langsam wirts interessant
Frau Leuthard, Forster, Bruaderer regierend üsers Land.
Drum wirsch im Sitzigszimmer bald a Katzatörli gseh
und in dr Wandelhalla wirts a Schualada bald geh.

Ob Bundes- oder andra Root, miar sind schtolz uf dia drei
dia krampfend sicher wia nit gschiid und händ gar nia meh frei!
Dass das au schlimmi Folga hät, das tarf ma nit vergässa:
Drei Männer meh, wo z'Mittag tagtäglich kalt müend frässa!

Zwei Chicks in geile Schkii-Aazüüg, händ miar do letschthin gseh,
d'Frau Janom Steiner und Cahannes bim Wahlkampf im Schnee.
Im Lächla sinds scho huara guat, dafür händs Müha mit Carva,
wenn d'Schtellig gsehsch vu dr Cahannes, meinsch sie spiili Harfa!

Vor luter Luaga hauts üs um, wer khunnt, hilft üs uf d'Bei,
as isch d'Cahannes und dia redt nit um da heissi Brei:
„Als Dank khönd iar im Herbscht mi wähla“, packt sie d'Chance bim Schopf.
Miar sind doch uf da Arsch kheit und nid öppa uf da Kopf!
Letscht Wucha hämmer Zügnis kriagt, oh Mann, sind miar Banausa,
im Tütsch a Zwei, in Mathe au, dr Kopf randvoll mit Flausa.
Und d'Lehreri, dia macht üs aa - und schreit, dia blöd Emanza:
„Im Hirn a Zella weniger und iar drei während Pflanza!“

Das got üs voll am Arsch vrbii, miar wüssend akkurat,
dr Otto Ineichen, dä hät a Praktikum parat.
Üs Tubla, wo nit läsa khönnt, au nid amol a Plänli,
schickt er do z'Chur ins Hochbauamt, döt gäbs no a paar Gschpäni.

Dr Uusgang z'Chur, dä khasch vergässa, do isch nüt meh los,
doch d'Poscht goht ab im Schkiigebiat, z'Arosa und z'Davos.
Au uf dr Heid muasch nid ins Bett, dia Siacha gäbend Gas,
bi Nachtschkiifahra, Table-Dance, Redbull und ganz viel Gras!

Miar händ das alles ussprobirt, zwei Nächt lang unter Schtrom,
was bruchsch sind AlckaSeltzer und a Schächtali Kondom!
Am Berg got würkli d'Party ab, do töfsch jetz nümma mozza,
noch'm Nacht-Schkii khasch bim EarlyBird grad unter ds Büffet khotza.